




TOP DI E FARO DI 100 AÑA BIEUW A KEDA REMOVE PA WORDO RESTAURA



Un dia special pa e Faro di Westpunt **Top di e Faro di 100 aña bieuw a keda remove pa wordo restaura**

NA principio di september Stichting Monumentenfonds Aruba (SMFA) a anuncia cu lo inicia cu e proyecto di restauracion di e California Lighthouse. Mientras cu e preparacionnan tabata tuma lugar y no tabata mira hopi cambio hopi hende ta puntra ki dia e trabounan ta cuminsa.

Pa algun siman caba e compania encarga cu e proyecto cual ta Ecoline Aruba a cuminsa cu e trabounan parti di paden y pafo caminda por a mira cambionan chikito.

Ayera 4 di november, tabata un dia hopi special y historico caminda cu e top di e faro di 100 aña bieuw a keda remove.

For di mainta trempa a cuminsa cu e trabounan pa kita e top cu ayudo di e compania Amast NV su kraan, Ecoline

Aruba cu t'e contratista encarga cu e proyecto di restauracion por a prepara e Top y kita esaki for di rib'e Faro.

SMFA tabata presente pa presencia e momento special aki y tambe a invita sr Romulo Fingal cu ta yiu di e ultimo cuidador di e Faro y cu tin un cariño special p'e monumento aki hunto cu su yiunan.

Tambe tabata presente Monumentenbureau cu t'e lider di proyecto, IMD Aruba como e arquitecto y Ecoline Aruba cu t'e compania encarga cu e trabounan di restauracion. Despues di awe e trabounan di restauracion lo sigui n'e Faro mes y e top lo bay pa restauracion. Mientras tanto e lampi mes a keda kita caba y lo ta instala rib'un construccion temporal pa por sigui haci su funcion durante e periodo di restauracion.

Ful e proceso a keda bon documenta igual cu tur e proceso di restauracion di e California Lighthouse cu lo ta documenta p'asina esaki por keda tambe pa futuro generacionnan. E proyecto lo tin un duracion di aproximadamente 7 luna mas y ora e ta cla lo keda habri pa publico por disfruta di e bunita bista di ariba.

